



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8

F-16 agütsütsü nangzükba atema Zelensky-i Denmark dang pelaba lemsatop

Sheoran-i 50m 3P nung bronze ngua India atema Olympic quota ka ngutetogo

VOL. XX NO. 310 (ADOK 310)

DIMAPUR SANGTENNÜ (TUESDAY)

LUROI (AUGUST) 22, 2023

₹ 5.00

## Aug 24 nungi NSF lokti mungdang tenzüksü

**Kohima, August 21, 2023 (TYO):** August 24-26 tashi Ukhrul, Manipur nung Naga Students' Federation (NSF) 30 buba Lokti Mungdang alitsü.

'Solidarity Beyond Borders' omen nung ajemdaker NSF mungdang ya Tangkhul Katamnao Saklong (TKS) ajanga acha-ayanga amongtsü.

Mungdang lapokba sentong nung School Education & SCERT Advisor Kekhriehoulie Yhome-i alakteta jaoker ka ama shilem agitsü aser Nagaland University Pro-Vice Chancellor Prof G T Thong-i onük jembitsü ta NSF general secretary Siipuni Ng. Philo-i ashi.

Mungdang nungsa MLA & taoba NSF president

Achumbemo Kikon aser Manipur MP Dr Lorho S. Pfoze na adentsü.

"NSF 30 buba Lokti Mungdang nung Federating units nungi tajemba agi nisung 25 aser sub-ordinate bodies nungi 15 asütsü. Unit shiai tetsür-tebur sü ana bener arutsü mepishir" ta Philo-isa metetdaksü.

August 24 nikongdang 4:00 ako nungi introductory session tenzüksü ta paisa shisem.

Iba benjungmong nung NSF nodal officer inyaksü atema NSF secretary social & culture Benjong Longchar shimogo. Anungji benjung dak sendakba osang 7005650984 ajanga metetpelatsü akok ta Philo-isa ashi.

## Kuki nunger takhangba magizüker: UNC

**Imphal, August 21, 2023 (Agencies):** Manipur nung Kuki-Zo nungeri ketdangsubaren balaka meshiba nung Naga nunger maden ta United Naga Council (UNC)-i metetdaksüogo. Kuki-Zo MLA 10-i Prime Minister dangi züluba memorandum nung Chief Secretary aser Director General of Police balaka meshia lir aser iba ya ketdangsubaren balaka meshiba ama ajiteter, ta UNC-i ashi.

Kuki-Zo nungeri Chandel district, Tengnoupal district aser Churachandpur district meshiba atema UNC-isa ashishiteper. Manipur nung kin o kin mepetmesü nung Kuki-Zo nungeri timtem ajuruba Naga nungeri angateta lir. Ajisüaka Kuki-Zo memorandum nung keta aliba onük aika magizüker kechiyong item onük nung Naga nunger aser talisa Manipur nung keta lir ta UNC-isa metetdaksü.

Kuki-Zo aser Meitei kintem tsüngda olemtep ajanga tangatetep kati arutsü atema UNC-i tiyongtsü nung mapa inyaka arur saka tetsükdaktem ajuruogo. Kuki-Zo nungeri jembiba aser memorandum agütsüba nung osang tai aser putiotsü meshitak shia lir aser iba yagi putiotsü melenshiba dang masü saka Naga nunger mezüngmeshir, ta UNC-i ashi.

2016 nung district tasentem tentetba anema UNC-i onk kar benoka aliba ano melemtet lir. Senapati aser Chandel district tem nungi district kar tentetba ya taoba Congress sorkari nisung kar peladaksütsü atema inyakba liasü ta UNC-isa metetdaksü.

District tasentem enoksemba Kuki-Zo nungeri ketdangsubaren balaka meshiba ya Naga nungeri magizüker aser parnoki ali indang osang lemsatopba ya putiotsü den meputep lir ta parnokisa ashi.

Kuki-Zo nungeri 'Outer Manipur' aser Kuki state meshiba ya tamendakdak mali ta UNC-isa metetdaksü.

1990s nung raradang nisung aika talidak toktsür aotsüsa aküm ta shia Naga district tem nung Kuki yimtsüngtem aküm ta ashiba yagi tangartem anisar. Tawa Kuki nungeri 1917-1919 Kuki Rebellion dang "Anglo-Kuki War" ta ajaba ya putiotsü yanglushiba lir, ta UNC-isa ashi.

## Minister Paiwang-i Mon nung Dengue aser Conjunctivitis osang metetpela



Minister P. Paiwang Konyak-i District Hospital Mon nung shirangertem ajurua senzüba angur.

**Dimapur, August 21, 2023 (DPRO Mon):** Mon jila nung dengue aser conjunctivitis kanga putetba osang angashiba sülen Health & Family Welfare Minister P. Paiwang Konyak-i osang metetpelatsü atema Mon tonga ogo.

Hombarnü Minister Paiwang den külemi DC, SP, CMO, MS, Konyak Civil Societies Mon züngsemtemi District Hospital Mon semdang aser idakji shirangertem den ajurutep sensaksem.

Mon nung CMO/MS aser medical staff temi district administration, CSOs & NGOs den yaritepa dengue osang prokshitsü atema Paiwang-i ashi.

Tang tashi nung nisung 413 dak dengue tendangba nung parnok 65 dak putetogo ta Mon nung Medical Superintendent Dr.

Mereninla Senlem-i ashi. Minister Paiwang-i Department dang shirangertem anepalutsü asoshi medical nüngdakattem pa dang ashitsü metetdaksü.

Paisa civil societies dang azü peria angutsü atema azü tenlaba mapa inyaksü mepishia metetdaksü.

Doctor temi Minister Paiwang den nübo, oset aser mozü peria maliba indang khuret lemsatop aser idangji pai akokba tashi yaritsü nangzük.

**Mon nung Aug 22 nungi 26 tashi school shibangtsü:** Minister Paiwang-i mozü ki semdangba sülen Deputy Commissioner Conference Hall nung District Administration, Police, Medical Staffs, HoDs aser KU/KNSK/KSU tirtem den senden ka amen.

Idangji Dengue, Conjunctivitis (Eye Flu), merükmejuba aser school shibangtsüba onüktem benoka lemsatop. Senden nung adentertem Conjunctivitis kanga menatepba nung ajemdaker August 22 nungi 26 tashi school ajak shibangtsü telemtetba agi.

Minister Paiwang-isa Assam Rifles, Red Cross, civil societies: KU, KNSK, KSU dang medical department den yariteptsü atema mepishia metetdaksü.

Nagaland nung War Against Drugs maparen dak sendakba nung paisa August 15 nü tezüngzüktep agiba nenshia metetdaksü.

Tizit aser Wokha nung lendong atalokba ama mataloktsü atema district administration, defence aser NGOs amalitepa iba mapa inyaksüla ta Paiwang-i ashi.

## Kerala nung Naga tsür ka dak tashiyim inyak

**Thiruvananthapuram, August 21, 2023 (Agencies):** Kerala nung tebur kati Nagaland nungi tetsür ka dak tashiyim mapa inyak.

Iba lendong ya August 20

aonung Thiruvananthapuram kübok Thumba nung atalok.

Iba lendong atalokba sülen Kerala police-i bushisüngdang ka tenzük aser nisung ka pua lir ta

osang angazüker. Nagaland nung tetsür ka dak tashiyim inyakba atema Kerala police-i Menamkulam nung Aneesh ta ser nisung ka apuba jangjaogo.

## State cabinet-i agitsü shiaka Manipur assembly session mali

**Imphal, August 21, 2023 (Agencies):** Manipur cabinet-i Governor Anusuiya Uikey dang August 21 nü assembly session jazütsü shiaka Raj Bhavan nungi sangdong kecha magütsüba ajanga Hombarnü session mali ta ketdangsurtemi ashi.

Manipur nung ozüing alema inyaksangshiba manener anungji parnok assembly session nung madentsü ta Kuki MLA 10-i ashiba sülen Manipur Governor-i sangdong kecha magütsü.

"Assembly session ka alitsü atema anogo 15 jelia sangdong ka agütsütsüla. Tang tashi nung Governor office nungi sangdong kecha mali" ta ketdangsur kati ashi. Ajisüaka state sorkaribo tan ita tetenzüklen assembly session alitsü asüngdanga liasü ta paisa

ashi. "State cabinet-i Manipur Governor dang August 21, 2023 nü 12 buba Manipur Legislative Assembly indang session pezübuba alitsü atema shiogo" ta August 4 nü sorkar sangdong ka nung metetdakja liasü.

"Manipur nung assembly session tatembangba agibaji March nung liasü. September 2 matongdang taruba session agitsüla" ta tanga ketdangsur kati ashi.

Külen, Congress Legislature Party Leader O Ibobi Singh-ia Deobarnü "Manipur cabinet-i agitsü lemtetaka assembly session alitsü ayonga mali" ta ashi.

"State assembly kati ita trok shia session ka ayonga agitsüla" ta Ibobi-isa ashi.

"Manipur nung law & order

mejungi aliba atema ni assembly session nung medentetsü" ta Churachandpur nungi Kuki nunger BJP MLA LM Khaute-i ashi.

Tensa majungba den Kuki nungeri ketdangsubaren balaka meshiba atema lemtet kecha magiba ajanga Kuki-Zomi-Hmar MLA temi session nung madentsü, ta Khaute-i metetdaksü.

Külen, Manipur nung Naga MLA temia assembly session nung madentsü metetdaksüogo. Manipur state sorkari Naga yimjung olemtep nung tetsükdaksü bentsür arur ta parnoki ashir.

September 2 matongdang assembly session jazütsü ta Chief Minister N Biren Singh-i osangbener dangbo shiogo.

OFFICE OF THE  
**AO SENDEN**  
"Khubur Asashi" (For the People)

Ref. No. .... Date: 21-08-2023

**SANGDONGER**

Kin ka maitsü aser meraket rongnung sobaliba sobusolemtsü ya ka lir. Anungji Ao kin sobusolemtsü sobur lokti sabang balala nung shilem agidang alima matsüngdang asen kin maitsü aser sobaliba meraket mechimenenja maksü bener marutsütsü atema Ao senso watsü wabong tanur tain ajaki asen kin sobusolem meraket wazüka sobutsü tekümdangtsü Ao Senden ajanga sangdonger. Tang nungi item inyakyim nung tim masüba ajitetra Ao Sendeni tapet mera agitsü.

(Chubawati Longchar) President  
(Intipokyim) Gen. Secretary

## Nagaland Angh-i VIT Convocation sentong moatsü



**Dimapur, Luroi/August 21 (TYO):** Chennai nung August 21, 2023 nü Vellore Institute of Technology (VIT) indang Convocation sentong agidang tongti tesemdang ka ama Nagaland Angh, La Ganesan dena liasü.

Iba sentong ya Engineering, Technology, Science, Humanities, Management aser Law nung UG, PG & Doctoral Programmes atema liasü.

Angh-i iba sentong nung jembidang graduate asür ajak nem tenüngsang agütsü aser iba Convocation anogo ya kaketshir takum nung kodanga mamashiba anogo ka asütsü, ta ashi.

Iba anogo ya graduate asürtem, tsürabor aser tesayurtem asoshi tejang tentetba mapang ka lir aser kaketshir takum nunga tongtipang anogo ka lir, kechiaser ibai takok anguba,

shisatsü ngutetba aser pei sasa tenük sünga bilemba anogo ka lir, ta pai ashi.

Graduate asüba ya taküm nung benjongba mapang ka lir, kechiaser ibai shisatsü angazükba tsütsü noklem ka tembangba mapang lir aser noklem tasen ka tenzüker, kong nai angazüka aliba amshitsü, ta Nagaland Angh-i ashi.

Kaketshir temi pei-pe discipline nung meranga azüngba ajanga degree ya agütsür, anungji alima nung tayongzükba balala koktettsü renema alitsüla, ta pai ayongzük.

Pai kaketshirtem dang linük yangerbera nung pei akokba yari tongti shilem agitsü ajungshia liasü.

Tang asenok aliba tendak entrepreneurship asoshi nukla peria lir, aser meranga inyaker asoshi lenmang peria lir, ta pai ashi aser kaketshirtem dang dangar nem mapa (job) agütsür

akumtsü ayongzüka liasü.

Pai parnok dang meranga inyakba tanüla kodanga mesamadaktsütsü ajungshia liasü.

Iba sentong nungsa Nagaland Angh, La Ganesan-i degree certificate agütsü aser Chancellor Dr. G Viswanathan-i medal tem agüja liasü.

Kasa sentong nung Nagaland Angh-i campus nung Dr.APJ Abdul Kalam Block aaser Swami Vivikananda Block semzükja liasü.

Iba sentong nung tesemdang tongti ama Balu Chaturvedula, SVP & Country Head, Walmart Global Tech dena liasü.

Vice Chancellor (VIT) Rambabu Kodali ajanga tarur pela agizükba o jembidi, kong Pro- Vice Chancellor V.S Kanchanan Bhaaskaran, Registrar VIT, aser dangar temi shilem agia liasü.

## KPC tongti zülur inyaktsü jangrar nübu asem lir

**Kohima, Luroi/August 21 (TYO):** Kohima Press Club (KPC) nung 2022-25 kümsük anünga aliba nung General Secretary inyaktsü jangra alirtemi nomination agüja aliba KPC indang Election Commission sangdong ajanga August 21, 2023 nü scrutiny süa liasü.

Iba mapa inyaktsü asoshi tejangrar candidate asem-i nominations agüja lir aser parnokji

Vishü Rita Krocha (KPC

Card No. 23), Seyiekietuo Keretsü (KPC Card No. 54) aser Loreni Tsanglao (KPC Card No. 15) alitsü, ta KPC indang Election Commission sangdong ka ajanga ashi.

Nominations agüja alir ajak iba by-election nung tokteptsü temsüa aliba ngutet.

Iba election nungi candidature agientsü asoshi August 22, 2023 nikongdang 3:00 ako ya tatem alitsü.

KPC General Secretary post

asoshi voting ya secret ballot ajanga August 23, 2023 nikongdang 1:00 ako nungi 3:00 ako tashi KPC Office nung alitsü.

Vote azüngba aser result sangdongba ya kasa anogosa alitsü, ta ashi.

Maneni KPC Election Commission sangdong ajangasa KPC nungi vote agütsütsü temsüa alirtem ajaki polling anogo pei temeden amshia vote agütsütsü ayongzük.

## Kohima aser Tseminyu district asoshi SDG roadmap yanglutsü shisa agiteper

**Dimapur, Luroi/August 21 (Agencies):** United Nations indang Sustainable Development Goals (SDGs) inyakyim district nung nüburttem nem tali tejangjaba angatdakttsütsü mechi Kohima aser Tseminyu district administration temi Planning & Transformation Department indang SDG Coordination Centre (SDGCC) den lungjemer SDG District Roadmaps yanglutsü asoshi shisa agitepba senden ka August 21, 2023 nü Deputy Commissioner, Kohima indang Conference Hall nung agia liasü. Iba workshop nung menden ya Addl. Deputy Commissioner Kohima, Rhosietu Nguori liasü.

Iba sentong ayongzükba nukjidong rateta jembidang Deputy Commissioner Tseminyu, Dr. Tino Chang ajanga SDGs kota tongtipang ta asüba indang rateta ashi aser district level nung terenlok asoshi ajaki shilem agitsü

ayongzük. Joint Secretary Home, Hiazu Meru-ia district tasentem nung data kanga junga lemsatsü nungdakba rasaa ashi.

'Nagaland SDG Vision 2030: Leaving No One Behind' nung nukjidong aser mangdang yua aliba tongtettsü asoshi Kohima aser Tseminyu district nung tejangja lenmang mesempoka ayutsü nukjidong nung iba sentong ya ayongzük liasü.

Iba sentong nung shilem ka ama district roadmap yanglutsü asoshi technical sessions tem ya SDGCC, Planning & Transformation Department nungi ketdangsur temi agia liasü.

Mezüngbuba session ya SDG Officer, Abilo Humtsoe-i agi aser iba mapang Nagaland aser ano Kohima aser Tseminyu district tem nung SDGs mapa kuma inyakbatem asadanga lemsatet.

Mezüng session nungsa data nung ajemdaker telemtetba agiba aser SDG inyakyim shidak

metettsü asoshi yimya balala amshiyim indang sayua liasü.

Monitoring & Evaluation, Khrietketou Suohu-i SDG indicators nung district inyakyim indang lemsatet.

Tanabuba session nung SDG District Roadmap yanglutsü asoshi 'one-to-one department consultations' agia liasü.

Iba sentong nung District Planning Officer Kohima, Assistant Planning Officer Kohima, Kohima aser Tseminyu district tem nungi Administrative Officers den Heads of Offices aser department nungi teshimtet nisungtem dena liasü.

SDGs ya alima ajanga nung mapa kumja inyaktsüba nukjidong 17 lir, koba tarutsü terenlok asoshi framework yanglutsü atema United Nations General Assembly (UNGA) ajanga 2015 kum yanglu aser linük ajanga nung 2030 tashinung takok ngua inyaktsüla.

## Indian Air Force ajanga Agni-veervayu (Musician) shimtsü

**Dimapur, Luroi/August 21 (TYO):** Agniveervayu (Musician) Intake 02/2023 atema nübu shimtsü asoshi Indian Air Force (IAF) ajanga sangdong ka agütsüogo.

Iba sangdong indang tejangja IAF indang official website: <https://agnipathvayu.cdac.in> nung angutsü.

Candidate tem recruitment test asoshi September 12 & 15, 2023 anogotem anepdang 6:00 ako aser 10:00 ako (cut-off time) tsüngta arutsüla. Temsüa aliba candidate tem shia aliba anogo aser mapang nung 11 Airmen Selection Centre bushia arutsüla, ta sangdong ajanga ashi.

## Para-Medical, Agri & Allied Courses asoshi NSEE-2023 candidate dang metetdakttsür

**Dimapur, Luroi/August 21 (TYO):** Para-Medical, Agri & Allied Courses nung NSEE-2023 asoshi session 2023 atema shimteta aliba candidate tem pei institutes/colleges nung shia aliba mapang tatakzük nung arua report agütsütsüla, ta Department of Technical Education sangdong ka ajanga ashi.

Taoba mapang candidate

temi agizükter aliba NSEE-2023 seats asoshi 'decline letters' mesüra 'non-acceptance letters' khenyongi magizüktsü. Iba policy ya August 21, 2023 nungi tenzüksü, ta sangdong ajanga ashi.

Mapang shidak nung candidate temi institutes/colleges nung admission magiba atema Department khuret masütsü, ta sangdong ajangasa ashi.

## Kohima nung 32 buba Nepali Bhasa Manyata Diwas mungogo

**Kohima, Luroi/August 21 (TYO):** Kohima nung aliba Gorkha nungertem 32 buba Nepali Bhasa Manyata Diwas (Nepali Language Recognition Day) sentong Gorkha Public Panchayat Kohima (GPPK) tawabangba kübok Chandmari, Kohima nung aliba Multi-Utility Hall nung Deobarnü munga liasü.

Iba sentong nung tesemdang tongti ama Tsütuoonomia Khel, Kohima Village, chairman, K. Neibou Sekhose-i jembidang, Constitution of India indang 8th Schedule nung Nepali oshi inokba atema Nepali nung dang tejak nüma tanga bilemstü ashi.

Meimchir tesendaktep atema oshioben ya kanga tongtipang lir, aser takumsangnu ajak pei-pe yimya nung tangla-tangsur, saka meimchir dang oshi oben tejangja ajanga kati ka den jembiteter, ta pai ashi.

Pai T Khel nung aliba Gorkha nung dang Tenyidie oshi angazüktsü aser akhi mapang nungi aliba tesendaktep tajungba aser takangba kumdakttsütsü ajungshi.

Tsüngremi Nepali aser T Khel nung alirtem tsüngta tesendaktep khenyongi balaka yanglutsü, ta pai ashi.

Otsü balala ajanga ashiba agi, Jasbir Khawas ya Nepal nungi 1872 kum Chandmari nung arua ali aser kum 151 tashi T. Khel aser Nepali nung tesendaktep tajung nung liyonga arur, ta pai ashi.

Tanü Nagaland nung teblemstü tulutiba rongnung 'ism' ya ka lir, aser asenok mekumdangra iba yagi kin ana tsüngta tesendaktep raksatsütsü, ta pai ashi.

"Iba tashidak nungi jenbuttsü asoshi asenok tesendaktep ya sapang tajungtiba. Asen otsüla-oboula aser lenir temi mapa

tajung inyaka yutsüba asenoki wazüka yudi," ta Sekhose-i ayongzük.

GPPK advisor Ranjit Lama ajanga iba anogomung indang rateta ashiba mapang, August 20, 1992 nü Indian Constitution indang 8th Schedule nung Nepali oshi inokba ya Nepali oshi jembir India nung million 10 asoshi tejak tentetba anogo ka lir, ta ashi.

Sobaliba mashi ka nung oshioben ya tongtipangtiba shilem lir, aser iba ya ajanga dang angatetteper, tesendaktep yanglur aser kin ka tali jangjar, ta pai ashi.

1992 nungi August 20 ya Nepali oshi jembiba India senso asoshi otsütsütsü anogo lir, kechiaser tetsü oshi linük pangdak tematiba nung agizükdakttsütsü meranga aruba asangsang akum aser iba yongji Indian Nepali nungeri kum shia "Bhasa Manyata Diwas" nungja agütsür amunger, ta pai ashi.

Iba oshi Indian Constitution nung inoktsü asoshi takhangba mezüngbuba ya January 18, 1956 nung Anand Singh Thapa, Veer Singh Bhandari aser Narendra Singh Rana nung temi Dehradun nungi kum nung pezüben adokba magazine, Jagrat Gorkha tenung nung agütsü, ta pai ashi.

Iba sentong nung menden GSUK vice president Jenny Lamechane Chettri liasü aser tesemdang tongti aser tongtipang nisungtemi milen tsükloka sentong tenzük.

GPPK general secretary Suresh Kumar Lama-i tarur pela agizükba o jembidi aser GPPK president Santu Thapa ajanga melepzüng o jembidi liasü.

Iba sentong nung Pfurba Lama-i temeja ken ka aten aser Rohan Sunar & Manisha Sonar nungeri tsüngsang ka agi lokti ayongzük liasü.

# Libya nung apuba India nunger lanur 17 Delhi tonga aruogo



Libya linük nung prangpong amer teloki tawa apuba India nunger 18 Hombarnü (August 21) Delhi tonga anir aruba sülen tangokba noksa nung angur. Parnok teimbaka Punjab aser Haryana na nungi liasü.

**New Delhi, Luroi/August 21 (Agencies):** Tunisia nung aliba Indian Embassy-i, taküm February ita nung Libya linük nung apuba India nunger lanur 17 parnoki August 19 nü India-i yokogo, ta metetdaksü; lanurtemji teimbaka Punjab aser Haryana na nungi liasü.

Indian Embassy-i X (taoba mapang twitter) ajanga, "Indian Embassy to Libya-i Punjab aser Haryana na nungi India nunger lanur 17 India-i yokogo, parnokji taküm Februay ita nungi Libya nung pua liasü. India nungertemji August 30 nü 8:30 ako nung Gulf Air tayimtsü ajanga India tonga ogo," ta metetdaksü.

Parnok kümzüka anir aruba maparen nung shilem agir AAP nungi Rajya Sabha MP, Vikramjit Singh Sahney-i, Punjab aser Haryana na nungi

teimba ser India nunger 17 Libya nungi anir aruogo; taoba ita parnok Tripoli nung aliba jail ka nungi chioka liasü, ta metetdaksü.

Tesüiba ita 6 tashi parnok Libya nung liasü, kechiyong travel agent temi parnok Italy-i yoktsü ta shia parnok ashiokja liasü.

X ajanga Vikramjit Singh Sahney-i Punjab Chief Minister Bhagwant Mann aser Haryana Chief Minister, Manohar Lal na dang India nunger lanurtem ashioktsür agent tem anema inyaktüsü, kechiyong parnok Italy-i aotsü sentong liasü saka Libya-i yok, ta metetdaksü.

"Akalpurakh Waheguru temoatsü agia onoki takok ngua Punjab aser Haryana nungi lanur 17 Libya nungi kümzüko. Agent temi parnok nisung shia dang nungi sen lakh

ter-asesem (13) agiba sülen parnok ashiokja liasü. @BhagwantMann @mlkhattar, tekaraba nung item agent tem anema FIR benoktsüla @sunfoundationIn @wpo," ta Singh-i metetdaksü.

Haryana nungi lanur 8, Punjab nungi pezü, Jammu nungi ka aser Himachal Pradesh nungi ka ta parnok Italy-i aotsü sentong liasü saka Libya-i yokba sülen parnok apu.

Vikramjit Singh Sahney-i item lanurtem den tongtepratepba sülen Ministry of External Affairs den-a tongtepratepa liasü. Iba sülen paisa Embassy of India Ambassador den jembia lanurtemji India-i anir arutsü atema inyaktüsü mepishia liasü.

Amongnü nikongdang lanur 17 pronglaji Delhi airport tonga aruogo.

# Mumbai nung ayongba INDIA teloktep senden nung AAP adentsü

**New Delhi, August 21 (Agencies):** Hombarnü Delhi chief minister Arvind Kejriwal-i, opposition party temi tentetba INDIA teloktep senden nung AAP adentsü, ta metetdaksü.

Mumbai nung ayongzüka senden ya August 31 aser September 1 nü amentsü.

Hombarnü osangbenertem den jembidang AAP tongti lenir Kejriwal-i, "Mumbai-i aotsü. Senden nung telemtebatemji nenok den lemsateptsü," ta metetdaksü.

State aika nung AAP aser

Congress na toktepba ajanga party ana tesendaktep jangrametemi lir, ajisüaka AAP-i INDIA teloktep senden nung adentsü telemteba agiogo.

Delhi nung Congress lenir kati, sangküm Lok Sabha election nung party-i Delhi nung aliba menden tenetprongla nungi tokteptsü, ta sangdongba sülen AAP-i INDIA teloktep senden nung madentsü, ta metetdakja liasü.

Tamalen Bengaluru nung ayongzüka INDIA teloktep

senden jakdang-a AAP-i, Parliament nung Congress-i Delhi Services Bill anema nokdaksü, ta yimjak nung nangzük nung ang AAP-i INDIA teloktep senden nungi adentsü, ta sangdonga liasü.

Amongnüa taküm assembly elections agitsü aliba Chhattisgarh state nung Arvind Kejriwal-i Bhupesh Baghel-i aniba Congress sorkar aija liasü aser Chhattisgarh nung aliba nüburttem dang tenangzüka onük 10 metetdakja liasü.



Mumbai, August 21, 2023: Kobi melii Mumbai nung INDIA teloktep senden amentsü lia Hombarnü Aaditya Thackeray aser Sanjay Raut na leniba nung Shiv Sena (UBT) lenirtem senden amendang tangokba noksa nung angur.

# PM Modi Brics senden nung adentsü atema tanü apusoa aotsü

**New Delhi, August 21 (Agencies):** Mongolbarnü Ato kilonser, Narendra Modi Johannesburg-i apusoa aotsü aser August 22 nungi 24 tashi 15buba BRICS senden nung adentsü.

Hombarnü Foreign secretary, Vinay Kwatra-i, taküm BRICS senden omenji "BRICS & Africa: Partnership for mutually accelerated growth, sustainable development and inclusive multilateralism" lir, ta metetdaksü.

Coronavirus wara aliba ajanga tesüiba küm asem tashi BRICS senden ya online ajanga dang agia liasü aser takümbo lenirtem adenshia iba senden nung adentsü.

"15buba BRICS senden atema India nungi business team kata South Africa-i oa Business Tracks senden nung adenba den külemi BRICS Business Council, BRICS Women Business Alliance aser BRICS Business Forum nunga adentsü," ta Kwatra-i metetdaksü.

BRICS senden aliba mapang Ato kilonser Modi aser China Tir Xi Jinping na jurila senden amentsü asü?, ta asüngdangba langzüdang Kwatra-i, "Senden ayongzüka linüki BRICS züngsem linüktem dang masü saka tanga linüktema aika jaokogo. Ato kilonseri South Africa nung koba linüktem

densa jurila senden amentsüar ibaji tang ang sentong renemdar," ta metetdaksü.

Modi-i tang agi tasembenbuba South Africa semdangtsü. India aser South Africa na tsüngda tesendaktep yangluba sülen küm 30 ajungba mapang nung Modi-i iba linük semdangtsü.


Johannesburg nung sentong ajak tembangba sülen August 25 nü Modi-i Greece semdangtsü aser Ato kilonser, Kyriakos Mitsotakis den senden amentsü.

BRICS senden nung Russia Tir, Vladimir Putin adentsü asü madentsüar memetet, kechiyong South Africa-a züngsem ka ama densema aliba International Criminal Court (ICC)-i Russia Tir aputsü atema tetuyuba agüja lir.

Ajisiüaka Putin-i video link ka ajanga iba senden nung adentsüa akok. Pa medentetyonga Russia foreign minister Sergey Lavrov leniba nung telok ka BRICS senden nung adentsü.

BRICS senden nung iba tentet ulushitsü aser shishilembatsü atema züngsem linüktemi pei linük sen amshitsü atema jembitsü.

Kasa senden nungjisa Global South dak sendakba tongtibang onüktem nung o lemteptsüa akok, ta India nunger ketdangser kati metetdaksü.



August 21, 2023 nü Srinagar nung anogo asemnü 'Panchayat with Good Governance' workshop tentenzük sentong nung J&K Lt. Governor Manoj Sinha aser Union Minister of State for Panchayat Raj, Moreswar Patil nati 'Meri Panchayat App' tenzüksüdang tangokba noksa nung angur.

# Karnataka sorkari NEP agiener New Education Policy tasen benoktsü

**Bengaluru, August 21 (Agencies):** Hombarnü Karnataka Deputy Chief Minister, DK Shivakumar-i, state sorkari tang aliba National Education Policy (NEP) agientsü aser sangküm state atema new education policy tasen ka renemtsü, ta metetdaksü.

NEP 2021 ya Centre nung BJP-i aniba NDA sorkari benokba lir.

Bengaluru nung sentong ka tembangba sülen osangbenertem den jembidang Congress lenir Shivakumar-i, parnok vice-chancellors aser shisashirtem den senden mena National Education Policy 2021

ya jungjunga asadangba sülen Karnataka state nungbo NEP 2021 ya agientsü telemteba agi, ta metetdaksü.

Shivakumar-isa, Karnataka nung shisaliok reju tajung aika lir aser human resources peria lir, anungji onoki state sasep nung education policy tasen benoktetsü, ta metetdaksü.

"Sangküm nungi onoki education policy tasen benoktsü. Iba atemaji hopta ka tsüngda onoki committee ka tentetsü," ta paisa metetdaksü.

BJP yimsüsüba mapang nung linük nung National Education Policy 2021 benokba mezüngbuba state ji Karnataka liasü.



## TIR YIMYIM YIMOBILEM (EDITORIAL)

DIMAPUR SANGTENNÜ, LUROI(AUGUST) 22, 2023

### Naga nunger kümdangtsüla

**M**anipur tensa ya tangsa tajungba küma aotsüba tensa ka masü, kechiyong kin o kin na azüpoka rarar aser kiojen dena rongdokja tsükchiteper aser tebandangtsür mali, anungji tejenokdak maka 'asenoki parnok metepsetra parnoki asenok tepsettsü' ta asüba tangatetba nung, talisa, Meitei aser Kuki nungerbo tetsür tebur ajak sepa amai dang kümer yimnüker asü mesüra yimmaker ta ashitsüar mejangjateti shisabolu tia nung lir. Kuki nungertem tenem nung alir aser Meitei nunger aliba lendenleni mouluteter aser Meitei nungertema tenem leni metuteter ta Manipur-bo Manipur saka mapa agibo ana küma sadangogo. Aji oda, Kuki nunger MLA-tem tetsübuba agi Manipur assembly senden nung medentettsü ta ashiba ken o nungji Manipur tensa tia asenoki angateter. Ibaji dang masü saka tang aliba Manipur state litsü telongtet ya shitak wazüka ayutsü atema Meitei nungertemi kanga meranger aser iba ken o akangshitsü atema tangsa tang Manipur assembly senden ayongzüka jembitsüla ta Meitei nunger lokti karibo akanger. Ajisüaka, tang Kuki nungertemi parnok joko Manipur nung melitetsü, anungji parnok nema yimten balaka kümtetjang ta ashiba kisung nokdangtsü atema jembitsü asoshi Manipur tatar senden ayongzüka jagi Manipur lima wazüka ayutsü masü, ano Manipur nunger asoshi tebilemstü tuluba-ang kümadoktsü. Idangjibo Meitei nunger o Kuki nunger kija masü saka Naga nungertem dena kin o kin na meputepdak adentsüsa akümtsü. Manipur nung kin tulu asem lir, Meitei, Naga aser Kuki aser kin asem rongnung ana putepa mali. Aji oda, Naga yimten ka kübok Naga nunger aliba lushi ajak adentsübaji Naga nunger temeten aser taginüba lir aser Naga yimten nüchiso atema raraba tongpang nükjidongji aji lir. Anungji, Manipur government nung Naga nunger MLA kati Meitei nungertem den yongrü ka nung ser tang aliba Manipur litsü nungi inch kata tanga state küma razüka aotsü memelatsü ta akangshia lemtetba nung aden nungbo, Naga nungertemi Naga nunger ashioksüba mapa ka asütsü. Atangji, tanga Manipur nung Naga MLA ti-ibo Meitei nungertem den külem ser tang aliba Manipur litsü kümzüka ayutsü atema lemtetba ken o nung denogo ta angashir, saka mamanger, aser dena ka alinunga meyipa agiadoktsüla, kechiyong Naga nunger tang tashi Naga yimten telatetba kati maru timtembaji iba ken o ya ajanga lir. Iba kasa ken o ya Nagaland Legislative Assembly nungbo aiben akangshia renemogo. Aji oda, shitakba agibo tang Manipur nung Naga nunger MLA-temia Kuki nunger amaji, Manipur state kübok masü Naga nungertema yimten balaka kümteta alitsüsa akangtsüla. Idangji dang Manipur tensa ya süngjemtsü aser Naga yimten tebilemsüa tembanga telemtetba ka agitettsü, Atangji, alima asünungji Manipur nunga likalilem tsütsü Kuki nunger o Naga nungertem na tsüngda tebilemstü tulu lir, ano iba tebilemstü dang nungibo Kuki nunger o Meitei nunger na aser Naga nunger o Meitei nunger tsüngdasa tebilemstü tuluba lir. Anungji, kodang Meitei nunger o Kuki nunger na tsüngda tsükchitepba ya manenteti talangka odir, idangji Naga nungertema ajemajema melitettsüsa tensa tia tamajung kar ajurutsu ana nung lir. Ashiko, idangjibo Manipur nung aliba kin asem ya shibai shiba anema rarar memetet ka kümadoktsü. Iba tensa ya Naga nunger asoshi balaka kanga tebilemstü tulu lir, kechiyong asenok Naga nungertem yabo Meitei aser Kuki nungertem anema masü saka parnok mechi asenok Naga nunger o Naga nunger na ano azü tokshia tsükchiteptsüsa akümtsü. Atangji, Meitei aser Kuki nunger na tsükchitepba amabo masü asenok Naga nungertembo telok balala lemsar tsükchitepaka, tang tashibo ki rongdokjabo meinyak aser tetsür tanurtem daka yimjak nung tashiyim agi maksü mapatem benschibabo mangashi. Ajisüaka, asenok mekümdangra, asenok Naga nungertem rongnung telok ana kümer, kari Kuki nunger aser kari Meitei nunger pu asemer ta asenokang parnok dang nungi tesashiba tsükchiteptsüsa akok. Iba amajika atalok nungbo tang asenoki Manipur yimjung atema sarasademtsüba aser ken tentsübatem ajak ya alima tsüngdang taaktsü mapatem ka dang kümadoktsü. Iba amaji mataloktsü atema asenok kanga sarasademtsüla aser shisa akatsüla.

#### **METONGSHITSÜR**

August 20, 2023 anogo Yimobilem nung süngratsü ta zülua aliba ojangtem to süngrangtsü ta metongshia azüngtsü mepishir. Ojang aibelena adokba atema sasara.

-Yimozülur.

## OLEMSABANG

### AOR SENMANG-TSÜMANG LEMSAYIM

- L.Kika Pongener.

(Yashi adok nungi...)

Tanü putu nung kinungpu aser kinungtsü na külemi sorkar mapa inyaka itasen chia aliba agi, tena külemi meranga inyaka bendenba rongsen agi yangluba ki-o-jen aser kimong-lumong alidena ayuba, item nungjibo kinungtsü aser jala shilema dena lir ta angateter. Ano tanü Jila nung alir kibong karbo kinungpu kecha meinyaker aser kinungtsübo sorkar mapa inyaka itasen achiba agi ki-o-jen yanglua kimung-lumong alia ayuba-a kibong karbo lir. Aji oda, item ajungaji asen sobaliba nung tetsür senmang shilem maka-a ta ser ajakji senmangertemi senmang amangtsübajibo tim masü ama angateter. Ano kibong karbo kinungbu yazü majung/langkotem nisung, hajira-a dena mooteter, saka kinungtsüi olang-angla mapa inyaka, kiset shiruru mesua meranga inyakba agi ali kimong alia, ki tajung yanglur anisungzüka lia aliba, saka tia maka kinungpu anojungi sua-adok, aser senmangtsüsa jabaso sosema mali-a ta ser senmangertemi kinungtsü o jala nembo kecha melemzüktsü agiadokra, ajia tim masüa ta angateter. Asen sobaliba asüyongjia putu tensa apet tajungba yanglushia melenshitsu. Aji oda, iba nungjibo tebur meyong senmang danga ta arokaroka ayitsü mali ama bilemer. Anungji item ki-o-jen aser kimong-lumong nungjibo kinungtsü o jala-a shilem lir ta angateter. Ano kanga tesusatsüka, asen Aor kibong ka kinungpu anojungi sua-adok, aser kinungtsüji tangar yimtsür/bendangtsür ka dang, aser tia maka jala-jabaso kata mesosem, oda tenati 'adopted' sua mesuba jala ka dang toktsür sua-adok. Ajisüaka, ki tajung telidak ki den, para ki (Rented house) kar aser kimong-lumong kar alidena yua liasü. Aji oda, item rongsentemji tena külemi sorkar mapa inyaka, itasen chia meranga inyaka bendenba agi yangluba aser alidenba liasü. Ajisüaka, senmangertem aser anuk-apangtem senteper, jabaso senmanger sosema malia ta ser kinungtsü nemjibo kimung ka danga aser ki ka danga melemzüktsü senmangertem jagi ajak agia-adok. Oda la tang telidak ki nungji la masü tashi alitsü, aser la tangar kiyi-i ora, ajia senmanger meyong asütsü ta dang senmangji lemsaba-a tenuki ngua aruogo. Atangji, iba ama inyakbajibo kangasa tashiyim, ambangyim aser merumero mapa ka amai angateter.

Anungji asen Aor senmang-tsümang lemsabayim nung ya joko tanü tashitemeteter putu nungbo, terabo temelenshiba ka nungdaker amai angateter. Yimtak-yimtsüng nung yimkümdang nungi, tsürabur nungi senmang amangtepa aruba alu-kimong kwika lir, iba nungjibo tetsür shilem kecha maka, saka Jila nung apuani külemi meranga inyaka bendenba rongsen agi yangluba ki-o-jen aser ali-kimong nungbo kinungtsü aser jala-a shilem lir ta angateter. Aji oda, otsüla-oboula nunger nungi benschia aruba sobaliba asüyongjia tanü putu den mepetra, tajungba küma yanglushia melenshitsu. Sobaliba asüyongjia majungbatembo tajungba küma melenshiba nungbo aibelen malia ta bilemer. Anungji yimtak-yimtsüng nung akaba alu-kimong senmang aser Jila nung akaba ali-kimong aser ki-o-jen senmang ana ya balala bendanga benschitsu-a ta kü tangatetba lemsateper.

- *Yimozülur dangi* -

### Tekülem ki asüngteta yudi

- N.I.Yanger

Tawa koba DABA Merali fellowship nung atalokogo, asenok ajaki kanga sasaa pilemer. Akhi social media malidang asübo par fellowship nung atalokji pari dang metet, saka tanü alima onsara ilaa kümadok nungji tenük mesepshidang alima süngadoker. Iba tatalokba ya arogoi meteta atalokba masü saka kari züzua inyakdang ajak tenüng menükogo. Tenlaki ka sapangji kanga metsünga-reta, meshiteta ayutsüla. Skit aidang khen khenbo Rum bottle nung süngo temerem(pega ja) züa bener atua yi agi aletba jilushia mangazüa sayur, iba ya kangasa mazü aser tenlaki den mapet. Arogo ka nung tenla kima Wawa-menü sentong ka ayongzük saka iba aonung tzünglu tulu aru nung tenla kilong nung iba sentong agitsüsa aküm. Sentong tarensen nung aliba ama dang agiyonga aodangji, maya-koya, love song, Hindi film ken ajak yimesoji temeshi tenlaki meraket (Sanctity of the church) maka aküm.

Tang nungibo joko arogoi tongtipang sentong alitsü nung jilia temeshi sabang nung kechi jiloshi kenten menü sayuner itemji tendangtet (censor) nungbo kanga jungla ta tepilemba ka lemsateper.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# UN dang India aser Pak nung Khristanem anema inyakba nokdangtsü mepishi



Pakistan nung Tenla ki 19 raksatsüba anema August 20, 2023 nü Karachi nung Khristanem adenshir longkak aйдang tangokba noksa nung angur.

**August 21, 2023:** Kerala nung aliba Kerala Catholic Bishops Council (KCBC)-i United Nations (UN) dang India aser Pakistan na nung Khristanem anema inyakba nokdangtsü atema tiyongtsüi aita inyakdaksüner, ta mepishiogo.

August 19, 2023 nü KCBC-i sangdong ka ajanga, "India aser Pakistan na nung Khristanem anema inyakba kanga bulua kümogo," ta metetdaksü.

Tang India kübok Manipur state nung Khristanem anema inyakba aser Pakistan nung Punjab province kübok Jaranwala nung Tenla kitem aser Khristanem ki aika rongdoktsüba sülen KCBC-i

UN dang item ama tatalokba nokdangtsü atema tiyongtsüi aita inyakdaksüner, ta mepishi.

May 3 nungi tenzüka Manipur nung rara adokba sülen state nung Tenla kitem den Khristan reju aika rongdoktsüogo. Anogo ishika tejaklen Pakistan nunga Muslim nunger telok kati Tenla ki 19 den Khristan ki 80 dak tema raksatsüogo.

KCBC otongdar, Jacob G Palakkappilly -i, "Pakistan nung nütsüng teimbai [Muslim nungeri] nütsüng ajema aliba Khristanem nem tiyazü nung tai tonglokja amaker," ta metetdaksü.

"Kiralongrar teloktemi linük balala nung telemsa

adokdaksü. Parnoki tesempa agi rara ajungshir, aser ibaji ajanga nisung million aika ajentsüsa akümer," ta pai metetdaksü.

New Delhi nung amenoka aliba United Christian Forum (UCF)-i, taküm küm tenzüker June ita tashi nung India nung Khristanem anema inyakba tatalokba 400 dak tema lir, ta metetdaksüogo.

India kübok state 28 nungi state 23 nungbo Khristanem anema inyakba tatalokba aika lir, ta July ita nung UCF report ka ajanga metetdakja liasü.

India nunger nütsüng shilem 2.3 dang Khristanem lir aser Pakistan nunga nütsüng shilem 1.5 shi dang Khristanem lir.

# ANOGO ABEN TSÜNGREM DEN

## Tenüngsang

Aser kodang parnok rongnung kati pa anepba angu, pai meyipa ola tulu agi Tsüngrem tenüng asang aser pai tetsüng nung aputaka Pa nem tenüngsang; aser Paji Samaria nunger liasü. Luke 17:15-16.

Tenüngsangji Khristan taküm kimong lir. Tenüngsangji temoatsü arulen repranga meteta agizükba lir. Khristan ka ama asenok dang tai atok, tasü nungi kümzük, aser Tsüngrem chirtem ama mesütet. Tenüng asangba mulungjang asoshi iba dang tajungba kuli malitsü!

Yisu mapang nung chitemra aketer telok nungi jentoka liasü. Iba tia nung parnok temeibatem den pilaa ali. Kodang chitemra aketer teri Yisu ajuru, parnoki Pa dang parnok dang aochiang ta kanga mepishi. Yisui parnok putir dangi yok. Parnoki tashi angaba ama, parnoki aneb! Item chitemra aketer terji parnok yimdaki marudaksü, parnok kidang melidaksüi, parnok mapa meinyakdaksü mesüra parnok tanurtem daka mekongshidaksü. Parnok kidangi meyipa aodang koda ka pelar alitsü, bilemdangang!

Parnok rongnung ka, Samaria nunger, anener, meyipa asema orr Yisu nem tenüngsang agütsü. Yihuda nungeri Samaria nungerji sempa saka Yisui pa anebtsü! Yisui pa dang asüngdang, "Tangartem to kong lir?" Chitemra aketer ter aneb. Chitemra aketer ter parnok temeibatem osangtajung lemsateptsü pelashishia kidangi ao. Saka kati dang temoatsü arudak shisadang aser anener, asema orr tenüngsang agütsü, shibai pa taküm meyipa agütsü pa külem.

Asenoka Kümtetdakba ajanga aneptsü. Kümtetdakbai aochia agütsüba taküm pelaa alitsü asenok nüji lir. Chitemra aketer telok amaji, Kümtetdakba nem anener tenüngsang magütsüi asenok temoatsü nung pelateptsü aritepa aor asü ?

Tsüngremi asenoki tenüng asangba repranger. Asenok tekülem, sarasadem, tenzüka aser anogo shia taküm Tsüngrem tenüng asangba dena alitsüla.

# Goa nung nisung kari Tenla kidang Hindu nunger süngyanglu toktsü



August 18, 2023 anepdang Goa nung aliba Tenla ki ka nung nisung kari Hindu nunger süngyanglu ka toktsüba sülen Khristanem Tenla kima adenshia aliba noksa nung angur.

**August 21, 2023:** Akhidang Portugal nunger colony aliba, Goa state nung aliba Tenla ki ka nungi police-i Hindu nunger süngyanglu ka agientsüogo.

Goa nung sorkari tentetba committee kati Portugal nungeri küm 450 yimsüsüba mapang raksatsüba Hindu nunger tekülem kitem yanglushitsü atema inyaker.

Aso 16buba mapang Portugal nungeri Goa nung yangluba Tenla ki, Our Lady of Health Church telung nung nisung kari Hindu nunger Durga tsüngrem süngyanglu ka tokja liasü, aser iba dak

sendakba nung August 19, 2023 nü Police-i nisung 10 anema ken o benokogo.

Hindu nungertemi, iba kimong nungji Durga tsüngrem nungtem nung yangluba tekülem ki ka raksatsüba sülen kasa tesem nungji Tenla ki asü, ta ashir.

Police officer, Diogo Gracias-i, "Onoki nisung 10 anema ken o benokogo," ta metetdaksü.

Tang tashi nung police-i aibelenertemji mapu, ta paisa metetdaksü.

"Onoki lenla ajaklen nungi bushisüngdangtsü; parnoki

ozüing alema Tenla kidangi ai aser yimsü balala amangertem tsüngda rara adokdaksütsü ajungshi," ta Gracias-i metetdaksü.

Police-i ashiba agi, August 19 anepdang züngia nisung 12-i Tenla kidangji Hindu nunger süngyangluji toktsü.

Hindu nunger telok 'Karni Sena'-i video ka ajanga, parnoki Tenla kidangji Hindu nunger süngyanglu toktsü, kechiyong akhidang iba tesem nungji Hindu nunger tekülem ki liasü, ta metetdakja liasü.

Kasa video ajangasa Hindu nungertem dang iba tesemji semdanga Durga tsüngrem dang nungi temoatsü meshiang, ta ayongzüka lir.

Osangbener den jembidang Arogo nung putir, Kennet Teles-i, "Arogo züngsemtemi tashishiba ken o agütsüba sülen police arua Tenla kidang nungi süngyangluji agienadokogo," ta metetdaksü.

Goa kübok Sancoale nung aliba Zauri ayongkümlen asüba Our Lady of Health Tenla ki ya Portugal nungertemi 1566 küm yanglua liasü. Indian archeological department

kübok iba kiojen ya wazüka ayuba kiojen ka lir.

Tang Goa nung BJP sorkar lir. Khristan lenirtemi, Tenla kidang süngyanglu toktsüba ya Hindu yimsü alia amangertemi sangküm General election agitsü lia yimsü balala amangertem tsüngda tesünep raksatsütsü nükjidong nung inyakba lir, ta aitsüogo.

Yaküm March ita nungi Goa nung BJP sorkar lir. Nütsüng million 1.54 dang aliba state nung ya nütsüng shilem 25 shi Khristanem lir aser Hindu nunger nütsüng shilem 67 lir.

1510 küm nungi 1961 küm tashi Goa ya Portuguese colony ka liasü.

Opposition Congress nungi MLA, Carlos Alvares Ferreira-i, "Tashi tulu alir yimtenren lenirtem indang temoatsü magiibo süngyangluji Tenla kidang meyutsütettsü," ta ashi.

Osangbener den jembidang Ferreira-i, "Iba ya Goa nunger tsüngda telemsa adokdaksütsü nükjidong nung inyakba lir. Taruba elections matong tashi item ama tatalokba alitsü," ta ashi.

Xavier Centre of Historical

Research in Goa nung Director, Anthony da Silva-i, "Iba ya Khristanem aser Hindu nunger tsüngda telemsa adokdaksütsü nükjidong nung jelia asalentong yanglur inyakba lir, kechiyong ibaji ajanga election nung tajangzüik angur," ta ashi.

Yaküm September ita nung Goa state sorkari akhidang Portugal nungeri yimsüsüba mapang nung raksatsüba Hindu nunger tekülem kitem yanglushitsü atema committee ka tentettsü telemtetba agia liasü.

Iba mapang nungji Chief Minister Pramod Sawant-i, archaeology department-i tekülem kitem survey agitsü, ta metetdakja liasü.

Taküm March ita nung Sawant-i, Portugal nungeri yimsüsüba mapang alibatem Goa nungi agienadoktsü, ta metetdakja liasü.

"Aso 15 buba aser 16buba mapang nung Portugal nunger yimsüsürtemi raksatsüba Hindu nunger tekülem kitem yanglushitsü atema sorkari dollar sen 240,600 lezmzütsüogo," ta Khristan putir Silva-i metetdaksü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Rüja**

(n) anakawa (rubbish)

\* Tzünglu arudang motzüi kima **rüja** aika nangdena toktsü.

**Rükang**

(v) teka agi tzü jashia oa yokang ta ashi (ask to sprinkle)

\* Kima auyi madoktsü atema tzü **rükang** ta pai kü dang ashi.

**OLONG PAITEP # 6613**

1		2		3		4	5			
				6						7
		8								
9				10		11				
			12						13	
						14				
16						17				

**TIPILEN**

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S \_ \_ \_ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

**LANGTSÜNGLEN**

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

**OLONG PAITEP # 6612 TELANGZÜBA**

**TIPILEN :**

- 2. Bangsemo, 6. Tiptem, 8. Jen,
- 9. Talila, 11. Aren, 12. Tzübo,
- 14. Alia, 16. Angati, 17. Odi,
- 18. Azü, 19. Sünglang.

**LANGTSÜNGLEN :**

- 1. Iipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong, 13. Ajizük,
- 14. Aitsü, 15. Tasa, 16. Aina.



**TEMEIMTSÜ OTSÜLA OBOULA AMA-TARI BULUBA AGI DOCTOR DEN:**

**Oboula** : Küna ya onsara ama-tari buluba agi nü dangi arura ya.

**Doctor** : Aji shitak ato, tantsür tambur akümdang ama-tari bulubaji tim dangako. Ni mozü kar zülutsütsü, aser aji chia tenzükdang otsüla nena kechisa nüngdakar zülua anidakangma.

**Otsüla** : Haija.  
(Kidang tena TV ajir)

**Otsüla** : Tambu, ni tera ayarar nabo bread den horlicks tera aijang koto.

**Oboula** : Ok, ni tang chokai lur bener atutsüjar.  
(Minute metsü sülen)

**Oboula** : Tantsü ya angai, nai meshiba ama omlette den coffee jemang.

**Otsüla** : Aree, ni oats tera arrjang ahabato koda?  
(Moral: Tim dang)

- Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Assam den arrtsü ken o aika angatettepogo:CM Pema Khandu**



Assam aser Arunachal Pradesh tsüngda arrtsü ken o teimba ka angatettepogo ta Arunachal Pradesh chief minister Pema Khandu-i metetdaksüogo.

**Guwahati, August 21, 2023**

**(Agencies):** Assam aser Arunachal Pradesh tsüngda arrtsü ken o teimba ka angatettepogo ta Arunachal Pradesh chief minister Pema Khandu-i ashi.

Talisa Bodo nunger aliba tesemtem nung ken o tem tangatettep kati aruogo ta pai ashi.

Itanagar nung aliba DK Convention Centre nung 'Understanding socio-cultural issues of Bodos in Arunachal' sentong nung jembidang CM Khandu-i "arrtsü ladangba ajanga mapa metembanger" ta ashi.

Yimjung aser terenlok külemi alitsü atema arrtsülen

alirtem külemi yaritepa inyaktsüla ta paisa ashi.

"Iba ya Congress sorkar mapang meinyaktet kechiyong parnoki nendaka meinyak. Parnok indang action plan tajung maliasü saka BJP sorkari Abhi Nahi Toh Kabhi Nahi tangatetba nung mapa inyaker" ta Arunachal Pradesh CM-isa metetdaksü.

Assam aser Arunachal Pradesh nungeri tangatetba tajung nung aser amalitepa alitsü tangatetba nung tejakleni aoer, ta paisa shisem.

Assam aser Arunachal Pradesh sorkar nung NDA sorkar aser state ana nung BJP sorkartem aliba den sendaktepa alir ajaki merangba ajanga Assam aser Arunachal Pradesh

tsüngsa arrtsülen tangatettep kati aruogo" ta Khandu-isa ashi.

Congress-i Northeast asoshi tebilemtsü bena meinyak aser iba ajanga Northeast nung teraksa bener aru. Talisa Assam nung ozüng alema inyaksangshi tenzük, prangpong sobaliba tenzük aser telungpurtem adok. Saka 2014 nungi maparen ajunga melenshiogo aser yimjung aruogo, ta paisa shisem.

Congress sorkar mapang ochimashi liasü aser iba ajanga Northeast nung terenlok aser yimjung maliasü. Tanü ozü sorkari temlungtetba tajung yur sorkar ketdangsübaren nungi ochimashi agiener, ta CM Khandu-isa metetdaksü.

**Trinamool Congress-i Assam LS menden 5 nung tokteptsü**

**Guwahati, August 21, 2023**

**(Agencies):** Trinamool Congress (TMC)-i Assam nung Lok Sabha election agidang parliamentary menden 5 nung tokteptsü bilemer ta TMC lennir Ripun Bora-i ashi.

TMC-i Darrang, Lakhimpur aser Kokrajhar constituency asem nung tokteptsü aser tanüngba constituency anaji yaser metetdaksütsü ta Bora-i ashi.

Congress Member of Parliament (MP) aliba constituency tem nung TMC-i metokteptsü, ta paisa shisem.

Linük nungi Bharatiya Janata Party (BJP) atsüngdoktsü ana nung lir ta Bora-i July 30 nü ashiba sülen tanü iba osang metetdaksüogo.

"2024 Lok Sabha elections ji BJP aser BJP aser ano opposition INDIA alliance tsüngda asütsü. Onoki BJP madak takok angutsü aser TMC ya INDIA den yariteper ka lir" ta Bora-isa metetdaksü.

"BJP-i INDIA alliance anema o tamajung jembir aser iba ajanga parnoki iba teloktep tsübuba sayur. Prime Minister Narendra Modi, Home Minister

Amit Shah aser Central lennirtemi opposition longjemba atema aoksar" ta Bora-isa shisem.

"Opposition party 26 longjemba ajanga BJP anokshiogo. PM Narendra Modi nungi Assam CM Himanta Biswa Sarma aser tongti BJP lennirtemi INDIA alliance anema jembir" ta Ripun Bora-isa shia liasü.

2014 küm BJP sorkar akümba sülen nungi senotsü tim mesüi amshiba atema Prime Minister Narendra Modi-i ola madoker ta paisa yashi ashi.

**GOVERNMENT OF NAGALAND  
DIRECTORATE OF TECHNICAL EDUCATION  
NAGALAND: KOHIMA-797004**

NO. DTE/ ESTT-2/02/2023-24/

Dt. Kohima, the 21st August, 2023

**NOTIFICATION**

This is informed to all those candidates nominated for NSEE-2023 seats in Para-Medical, Agri&Allied Courses during the session 2023 are directed to immediately report to their respective Institutes / Colleges within the specified time period.

The Department of Technical Education will not accept any decline Letter / non-acceptance to the NSEE-2023 seats already accepted by candidates from the date of publication of this notification and shall not take responsibility for those Candidates failing to take admission in Institutes/Colleges in time.

This is for kind information and strict compliance by all concerned.

Sd/-  
(Er. VIPULHOU LHOUNGU)  
Director.

**GOVERNMENT OF NAGALAND  
DIRECTORATE OF INDUSTRIES & COMMERCE  
email : industrynaga@gmail.com.e-fax:08468825666  
www.industry.nagaland.gov.in**

NO.IND/DEV/SA/78/95 (Vol-II)

Dated, Kohima, the th Aug. 2023

**ADVERTISEMENT**

Interested Indigenous artisans of Nagaland are hereby invited for State Level Award in the field of Handloom (Textile) & Handicraft. Only genuine artisans above 18 years of age engaged in the field of Handloom (Textile) & Handicraft for the last 5(five) years & above may collect application form from the Directorate of Industries & Commerce, Development Branch, Room No- 34 (1st floor), Kohima Nagaland on any working days.

The last date for submission of form is 08/09/2023 after which no application will be entertained.

Sd/-  
(A.Temjen Jamir)  
Director of Industries & Commerce.

F-16 agütsütsü nangzükba atema Zelensky-i Denmark dang pelaba lemsatep

Kyiv, Luroi/August 21 (Agencies): Denmark aser Netherlands nati America nung yangluba rara dang amshiba F-16 tayimtsütem agütsütsü nangzükba sülen anogo ka lir Ukraine tir Volodymyr Zelenskyy-i Hombarnü, Russia nung den raraba mapang parnok nem teyari agütsüba atema Denmark nung ozüing yanglurtem dang kanga pelaba lemsatep.

Zelenskyy-i ashiba agi, Russia-i Ukraine amakba ya takok ngutetra, Europe nung tanga linüktema Russia ket nungi jenboa malitsü.

"Ukraine-i takok mongutetra Russia kidangertem ajak lendong nung lir," ta pai Copenhagen nung o jembiba mapang ashi.

Zelenskyy-i, Ukraine-i tashiyim amshirtem ket nungi nüjiso aser democracy amala Western values tem kümzükä ayutsü meranger ta ashiba den, parnok dang nungi kanga agi tashi taitba Russia indang sepaitem kanga junga nokdangtetsü atema Ukraine nem teyari tapet agütsütsü nüngdaker, ta shisem.

Ukraine-i parnok nem teyari agütsüba anüolen aliba linüktem dang ita aika F-16 tayimtsütem agütsütsü asoshi mepeshia arudar. Ukraine nung sepaitem tang tashi Soviet-era combat tayimtsütem amshidar aser anüng nungi teyari kecha magütsü parnoki Russia nung mintoktsü meranga arudar, koba ken o asadangertemi ashiba agi tetsükdaktsü tulu ka lir.

Zelenskyy-i Telegram ajanga ashiba agi, Ukraine nem jet 42 agütsütsü. Denmark-i F-16 19 agütsütsü nangzükogo, koba pilot tem ita pezü nungi trok tashi training agiba tembangba sülen taküm küm tatemlen angutsü imlar.

Ajisüaka Ukraine nung squadron tem raratsü asoshi renemtsü atema iba dang nungi mapang talangba agitsü akok. Europe aser Africa nung U.S. air forces commander U.S. Air Force Gen. James Hecker-i taoba hopta ashiba agi, Ukraine nem F-16s agütsüba ajanga temelenshi kecha balaka bener marutsü. F-16 squadron tem raratsü atema renemtsü asoshi küm pezü mesüra pongu agitsü, ta pai ashi.

Ken o mejangjai aliba rongnung F-16 nung kechi amala prangbong abentsü aser Ukraine nung iba tayimtsü ya koda anepalutsü, item ya densema lir.

United States-i taoba hopta Ukraine nem F-16 agütsütsü asoshi Netherlands aser Denmark nem temelaba agütsügo.

Zelenskyy-i Deobarnü Netherlands semdanga Dutch Ato Kilonser Mark Rutte den külemi Eindhoven yimti kübok base ka nung anena aliba F-16 ana asadangogo.

Koba mapang tashi nung iba tayimtsü agütsütsü iba indang Rutte-i osang tejangja magütsü aser ashiba agi, Ukraine-i koba mapang tashi nung crew aser infrastructure renemetdir iba dak keta lir.

OFFICE OF THE AOLI LONGCHAR KIDONG H.Q. MOKOKCHUNG AFFIDAVIT

DECLARATION OF COPY RIGHTS ON THE BOOK OF "AOLI LONGCHAR LIYONGA JAJABA LIPOK" PUBLISHED BY AOLI LONGCHAR MONGDANG HQS MOKOKCHUNG, NAGALAND.

We, (1). Dr. IMKONGWAPANG, President, (2). MR. AREN LONGCHAR, Secretary, Aoli Longchar, Mongdang Hqs-Mokokchung, permanently residing at Mokokchung Town, P.O- & P.S- Mokokchung, district- Mokokchung, and (3). MR. LOLENMAYANG, Author of AOLI LONGCHAR LIYONGA JAJABA LIPOK. Permanently residing at Nagarjan, P.O- & P.S-Dimapur, district- Dimapur, State- Nagaland, do hereby solemnly affirm and declare as under:

- 1. That, we the declarants of this affidavit.
2. That, the "AOLI LONGCHAR LIYONGA JAJABA LIPOK" the Origin of Aoli Longchar Clan book was compiled by MR.LOLENMAYANG and published by AOLI LONGCHAR MONGDANG Hqs- Mokokchung in the year 2022.
3. That, the above noted book of Copyright was reserved by the author. Whereas, the above noted book is not for the individual property. It is therefore, after long deliberation by Aoli Longchar Mongdang, it is resolved that, the copyright ownership of the said book shall be retained with the AOLI LONGCHAR MONGDANG. Henceforth, the Copy Right of the AOLI LONGCHAR LIYONGA JAJABA LIPOK book shall be the copy right owner of the Aoli Longchar Mongdang with effect from 11-08-2023.

That, the above declaration are true to our knowledge and nothing has been concealed therein. And we signed this declaration on this the 11th day of August 2023.

Signature of Longchar Mongdang:

(DR. IMKONGWAPANG) President

(MR. AREN LONGCHAR) Secretary Aoli Longchar Mongdang, Mokokchung.

Regd. No. 3997/23 Dated 11/08/2023

Signature of Author:

(MR. LOLENMAYANG)

Thailand nung Pheu Thai allies temi sorkar kumtetsü

Bangkok, Luroi/August 21 (Agencies): Thailand nung sorkar tasen ka kumteta ita asem tashi yimtenren tsütsü atsütepa aruba tatem kati arutsü mechi Pheu Thai Party ajanga taoba mapang mitkar den tesendaktep aliba party ana densema danga party ter den coalition ka kumteto.

Ato kilonser tasen ka asoshi parliamentary vote agitsü anogo ka lia aser taoba ato kilonser Thaksin Shinawatra küm 15 bendang lima nung jenoka lir meyipa arutsü lia Hombarnü iba osang ya sangdong.

Pheu Thai ajanga linük nung lenir inyaktsü asoshi real estate mogul Srettha Thavisin shimtsü imlar.

Thailand nung May 14 nü election agiba nung Pheu Thai party ya tanabuba jenjang nung liasü, saka iba election nung vote timtiba ngutetba Move Forward party ajanga sorkar akumtsü merangba upper house nung election majangi shima aliba züngsem temi nokdangba sülen Pheu Thai party maongka angur.

Arishi küm 60 tain Srettha ya yimtenren tsütsü nübu tasen aser ato kiloner mapa angutsü aser sorkar kumtetsü atema legislator 375 mesüra parliament indang upper house aser lower house meyoaktep züngsem tesadang ka dang timbai pa bukumtsüla.

Pheu Thai lenir Cholnan

Srikaew-i osangbener dang ashiba agi, coalition tasenba nungya danga party ter-i nungiter aser item rongnung ato kilonser menden nungi alutsü alisang Prayuth Chan-ocha den sendaktepa aliba United Thai Nation Party aser Deputy Prime Minister Prawit Wongsuwan'er Palang Pracharat Party dena lir.

Prayuth ya taoba mapang mitkar tanishir ka liasü aser pa lenisüba kübok mitkar tashi amshia 2014 küm Pheu Thai sorkar atsüngdok, koba Thaksin tenu Yingluck Shinawatra-i anir liasü.

Prayuth yimsüsüba mendeni aruba sülen Thailand indang constitution zülushia conservative establishment-i memolungba election nung takok angur temi sorkar kumtetsü kanga tasak akum.

The Bangkok Post website ajanga ashiba agi, Pheu Thai nungi Srettha bukumba coalition party 11 ya züngsem 500 aliba lower house nung vote 314 lir. Coalition nung Pheu Thai ya party tulutiba aser vote 141 lir.

"Srettha-i nüngdakba vote angutsü temolung lemteta lir," ta Cholnan-i ashi.

"Rongsenketzüing tanaben shia arutsü asoshi asenoki kanga kera inyaktsüla aser yimtenren, rongsenketzüing aser nüburtem tashi ita alitsü asoshi sentongtem yanglutsüla," ta pai ashi.

(Maneni tapak 8 nung...)

PELABA LEMSATEPER



(03.03.1927 - 12.08.2023)

"Kechiyong Shibaisa ni bushiteter pai taküm angur. Aser Kibuba yimlibilem angutsü" A. Shin 8:35

Onoki teti meima aliba temeim Ojala Sualemla (Chuchuyimlang) shirang tenzükli nungi asü pila anogotem tashi temeimertem kwinakati nenok tajungtiba agi nungita ozü mulung anisüngzükdakja yaritepogo nenok ajak dang kanga pelaba lemsateper. Tongtibangsa adianutem shirnokisa nenok sarasadem, nübu aser rongsen tulu agi yaria onok meimogo, ajak dang kümrem pelaba den asen teyanglur Tsüngremi nenok ajak moajang ta ozü sarasadem.

Temeim Jala Jabasotem, Semchirtem & Kinungertem.

SÜR KÜM KA AJUNGBA MENUNGRAA BILEMTETER



LATE PUNAREPLA (Changtongya) W/o. LATE MARTUBA ASO : 15.7.1926 - ASÜ: 22.8.2022

Temeim Ojala küm 96 tashi arishia lir iba lima toktsür küm ka ajungba anogo nung kinungertem Tsüngrem nem tenüngsang agüja lai temeim aser sayubentsü tajung agütsüba bilemteta amonger.

Temeim Chirnur, Semchirsemnur aser Kinungertem.

OFFICE OF THE YAONGYIMSEN SENSO TELONGJEM DIMAPUR

Dimapur : 797112, Nagaland

TENÜNGSANG AGÜTSÜR



Dr. Watisenla Imsong

Yaongyimsen Senso Telongjem Dimapur (YSTD) ajanga Wb.T.Merenlemba aser Wt. Apokla tena jala Kr. Watisenla Imsong, degree of Doctor of Philosophy (Ph.D), Department of Agronomy, Nagaland University nungi ajangzüketba asoshi tenüngsang aser akhüm agütsür.

Tsüngremi na tarutsü wadang ajak nung moajang.

Sd/- I. Sanen Longkumer Tir

Sd/- Temjen A. Imsong Tezülur

Canada: Morok mi tensa azüoktsü atema army yoktsü

Ottawa, Luroi/August 21 (Agencies): British Columbia nung morok mi kanga kara prokshia oa aliba azüoktsü atema military yoktsü, ta Ato Kilonser Justin Trudeau-i Deobarnü ashi.

Canada kübok iba province nung tesem 400 shi nung morok mi adoker lir aser iba ajanga nisung 35,000 dak tema pei talidak ki toktsür aotsüsa kümogo.

(Maneni tapak 8 nung...)

## Imchaba Master Memorial volleyball asayamung ayonger

**Dimapur, Luroi/August 21 (TYO) :** 16buba Imchaba Master Memorial Trophy 2023, September 19 nungi 22 tashi asayatsü. Iba asayamung ya Mokokchung District Volleyball Association (MDVA)-i ayongzüka asayatsü.

Asayamung nung takok angur, tanabuba, tasembuba aser pezübuba jenjang nung tembangba team tem nem senpet sen 80,000; 50,000; 30,000 aser 20,000 agütsütsü.

Maneni Best Spiker, Best Setter aser player of the Tournament nem senpet sen 5000 agütsütsü. Semifinal tonga asayaba team pezü dak alia asayamung nung shilem agiba team ajak nem sen 5000 agütsütsü. Mokokchung District adener tanga district nungi aruba team tem nem senzüsönpongba taa agütsütsü. Asayamung nung shilem agitsü jangraba team temi form Lim Counter Kohima, Dimapur

as er Mokokchung nungi agizüktettsü, koba August 23 nungi agütsü tenzüksü.

Form benoktsü atema tatembangbuba anogo September 15 nü asütsü.

Osang tejangjaba agitsü atema Organising Committee Convenor: 7005254697; Technical Committee Convenor: 9612938723 aser MDVA tir: 8132865806 nung den tongteprateptsü metetdaksüogo.

## Sheoran-i 50m 3P nung bronze ngua India atema Olympic quota ka ngutetogo



**Luroi/August 21, 2023 (Agencies):** ISSF World Championships nung Mehuli Ghosh-i 10m air rifle nung bronze medal ka ngua 2024 Paris Olympics atema quota ka ngutetba sülen anogo ka lir Deobarnü Akhil Sheoran-ia tebur 50m rifle 3 Positions (3P) nung bronze medal ngua Olympics atema quota ka ngutetogo.

Sheoran-i bronze medal ka anguba sülen Paris 2024 atema India nung asayartemi quota pongububa ngutetogo aser iba asaya nung Swapnil Kusale-i taoba küm Cairo nung Worlds

Championships nung Olympics atema quota ngutetba sülen Sheoran-i tanabuba ngutetogo. Tebur 50m rifle 3 Positions (3P) nung nung Austria nung asayar Alexander Schmirli-i gold angu aser Czech Republic nung asayar Petr Nymbursky-i silver medal ngua liasü.

Tetsür 25m pistol final nung Rhythm Sangwan-i junga akha saka la tibuba nung tembangba sülen Paris 2024 atema quota mongutet.

Iba asayamung nung India team-i gold asem aser silver asem ngua China sülen

tanabuba jenjang nung lir shirnoki gold tenet densema ajak senteper medal 13 ngua lir.

Kija asaya nung bronze medal anguba dak alia Sheoran-i, Aishwary Pratap Singh Tomar aser Niraj Kumar na den senteper point 1750 ngua tebur 3P team gold nguogo.

Maneni tetsür 25m pistol team nung Sangwan, Manu Bhaker aser Esha Singh nung senteper point 1744 ngua gold nguogo. Iba asaya nung Chinese Taipei-i silver aser China-i bronze medal ngua liasü.

## Canada: Morok mi tensa...

(Tapak 7 nungi...)

British Columbia nung Hokolbarnü emergency benokogo aser lendong nungi jena aoertem aser mibenertem nem kecha tetsükdaktsü magütsütsü atema nungdak makaba nung senzsenpong masütsü tenokdangba agütsüogo aser mi adoker aliba tesem nung nung noksa agia aliba drone amshirtem dang teküzmükertem nem tetsükdaktsü magütsütsü mepeshia metetdaksüogo.

Trudeau-i X ajanga ashiba agi, federal sorkari nübürtem aninba nung teyari agütsütsü atema aser British Columbia sorkar tenüngdakba apir Canada military nem teyari

agütsükdaktsütsü. Canada nung taküm morok mi lendong tesashitiba agi kongshir lir aser Northwest len tesem 200 dak tema nung morok mi tenzüker lir.

British Columbia kübok yimti kar nungbo air quality index (AQI) 350 dak tema lir koba nübürtem asoshi kanga lendong lir.

West Kelowna fire chief Jason Brolund-i ashiba agi, anogo pezü tashi mi abenba sülen timla karbo nguogo. Paisa, tensa terabo tajungba kümogo aser iba ajanga mibenertemi mi adoka aliba tesem nung tzu inoktsütettsüsa kümogo, koba ajanga

nütsünyongsük 150,000 aliba jila amokmerendar.

Canada nung arem nung morok mi adokba ya tang tasen masü ajisüaka taküm morok mi tesashiba adoker lir, koba mongintemi tzu mopung melenshiba dak tai tonglokja arudar.

Kasa mapang nung Canada sorkar ketdangsürtemi lendong agi kongshir aliba tesemtem nung alirtem dang parnok taküm kümzüksü aser parnok kümzüksü merangba mapang mibenertem taküm samaba nungi jenboa alitsü atema tangsa tang pei talidak ki toktsür aotsü mepeshia metetdaksüogo.

## BWF World Championships: HS Prannoy tanabuba round-i iogo

**Luroi/August 21, 2023 (Agencies):** India nung badminton asayar tejen HS Prannoy-i, hombarnü tang asaya aliba BWF World Championships mezüngbuba round nung Finland nung asayar Kalle Koljonen koka tanabuba round-i iogo.

Arishi küm 31 tain Prannoy-i iba asaya 24-22, 21-10 agi straight sets nung koka tanabuba round tongtetogo.

Mezüngbuba game nung asayar ana kanga toktepa asaya aser tenaponglai kati ka nem asaya amokbanger masayadaktsü asaya aser asaya akoktsü atema point 21 nungdaka aliba adena asaya liasü.

Asaya tetenzüki Kalle 8-4 agi tejakdang liasü, ajisüaka Prannoy-i point tenet atonga ngua pa point 11-8 agi tejakdang aküm. Ajisüaka meyiper Koljonen-ia Prannoy menepa asaya saka asaya tatem India nung asayar yagi kanga stüngjemer asaya-a point 24-22 agi akok.

Tanabuba game bo Prannoy-i amokbanger asaya aser asaya tetenzüklen pa point 4 agi tejakdang ser 6-2 liasü aser Kalle nem asaya tepeyong pa memenepdaktsü asaya-a 21-10 agi ayong ayonga koka liasü.

Kasa asayamung nung India nung tarep temeyoktep asayar Sikki Reddy aser Rohan Kapoor na mezüngbuba round nung tsükogo. Tena ya Scotland nung tarep Julie Macpherson aser Adam Hall nati 21-14, 20-22, 21-18 agi koka liasü.

Mezüngbuba game nung India nung tarep yagi Scotland nung tarep nem ya kecha timtem magütsü asaya aser Macpherson o Hall nati 21-14 agi asaya ayong ayonga akok.

Ajisüaka tanabuba asaya nungbo Reddy aser Kapoor nati asendenshir kanga meranga asaya-a asaya 22-20 agi akok.

Tasembuba asaya tarep ana tsüngda kanga toktepa asaya saka tatem nung Julie aser Adam nati point 21-18 agi koka India nung tarep ya tsükdaksü.

## Thailand nung Pheu Thai allies...

(Tapak 7 nungi...)

Move Forward ya menden 151 lir aser parnoki Pheu Thai meyaritsü ta shiogo aser parnoki election result raksatsü aser nübürtemi molungba ama masü inyaker, ta ashir.

Nübürtem nungi shisa agiba nung Pheu Thai ajanga Prayuth aser Prawit indang party tem densema coalition sorkar kumtetsü sentong memolung. National Institute for Development Administration ajanga iba survey agia Deobarnü sayaba nung parnoki survey agiba shilem 64 shii mitkar-i yariba party den Pheu Thai party alliance yangluba khenyongo magizüker.

Alliance nung telemsa adoka lir saka sorkar ka kumtetsü asoshi memonutsüla, ta Cholnan-i ashi.

Thaksin'er jalai Pheu Thai tenüng nung nübürtem dang election mapang mitkar aliba party tem den madentsü nangzükbaba ama meinyakba asoshi tatok meshia liasü.

"Linük aotsü asoshi asenoki atsüanem akatsüla. Pheu Thai ajanga yamai inyakba atema taa angutsü, aser ibaji nübürtemi aitsüba alitsü. Nisung aika mepeladaktsüba asoshi onoki tatok meshir," ta Paetongtarn Shinawatra-i Deobarnü ashi.

Sorkar kumtetra linük indang tebilemetsü bentettsü asoshi party-i bendanga agütsür

inyaktsü aser kübo Thailand-i meyipa shilangtsü aliba aser politics tesendaktep mali, ta lai ashi.

Arishi küm 74 tain taoba mapang telecommunications tycoon alisang Thaksin Shinawatra ya 2001 nungi 2006 tashi ato kilonser inyaka arur mitkar temi tashiyim amshia atsüngdok aser pa ya Mongulbarnep 9:00 ako nung Bangkok indang Don Mueang Airport tonga arutsü imlar. Pa arur ghonda ishika lira to kilonser atema vote agiteptsü.

Ochimashi mapa inyakba mechi tepuokdak ayutsü aliba mechi pa Thailand nungi jena aoba sülen Dubai nung timba ali, saka pa tepuokdak ayutsü akok.

Thaksin ya pa jurila tayimtsü nungi ayazüka aluba den külemi aputsü aser Supreme Court dangi anir aotsü aser Department of Corrections nem agütsütsü, ta Thailand nung aliba The Nation osang kaket dang osang kar ajanga ashi.

"Thaksin ya tain asünung tepuokdak aliba doctor temi pa temang reprangtsü aser pa dak timtem putetra pa tepuokdak aliba mozüki nung ayutsü atema doctor temi telemtetba agitsü," ta osang ajanga ashi.

"Tepuokdak yulibo par kinunger temi dang pa den ajurutsü warden temi telemtetba agitsü," ta ashi.

## BILEMDANGANG

"Telongjem nung tashi lir."